

G. Femora postica modice incrassata. Tibiæ basi macula nigra notatæ vel saltim ima basi nigra. Gula distincta. Subg. 5. *Plagiognathus* FIEB., REUT. Conspectus specierum:

a. Femora omnia marginibus superiore et inferiore vitta longitudinali nigra signatis, supra apicem versus et subtus guttis nigris notata. *Pl. arborum* F.

aa. Femora tantum guttis nigris sæpe seriatis notata vel tota nigra.

b. Corpus supra nigro- vel fusco-pilosulum.

c. Antennæ articulo primo apice excepto secundoque nigris, hoc apicem versus pallidior. Supra fulvus. *Pl. fulvipennis* KIRSCHB.

cc. Antennæ totæ vel ad maximam partem testaceæ. Corpus supra virescens.

d. Antennæ totæ pallidæ, articulo primo tantum intus atomo nigro notato. Mas et femina concolores. Corpus supra sat dense nigro- vel nigro-fuscopilosum et subtiliter adpressim aureo-pubescentis, glauco-virescens; subtus virescens, subtiliter pallido-pubescentis. Hemelytra innotata. Membrana dilute infumata, venis pallidis, areola minore tota et majore apicem versus obscurioribus, macula pone apicem cunei areolam majorem attingente hyalina, postice fuscescenti-terminata, striola apici venæ brachialis parallela nigricante. Pedes testacei. Femora nigro-guttulosa, anteriores guttulis in medio seriatis. Tibiæ spinulis nigris e punctis sat magnis nigris nascentibus. Mas oblongus, fronte oculo circiter duplo latiore. Long. $4\frac{1}{2}$ m.m. Femina sub-elliptica, fronte oculo paullo plus quam duplo latiore, femoribus posticis sat incrassatis. Long. $4\frac{1}{4}$ m.m. Habitat in Tyrolia, Lienz, in alpebus Kirschbaumeralpe dictis, D. A. PALMÉN. *Pl. alpinus* REUT. n. sp. (Mus. Helsingfors).

dd. Antennæ articulo secundo basi nigro, primo vel toto nigro vel basi annuloque anteapi-